

東
華
續
錄

東華續錄

咸豐九十五

臣王先謙敬編

臣陶澐宣恭校

秋七月癸巳朔諭軍機大臣等前因僧格林沁等奏大沽礮臺危急當令僧格林沁妥籌大局辦理茲據奏稱回守天津必致兵心搖動夷船一經入河津郡萬難保全見在情形惟有嚴守大沽已連日設法布置激勵馬步官軍竭力固守等語覽所奏情形自屬確有見地著卽激勵南北兩岸在防將士悉力固守如有臨敵退縮及亂言惑眾者該大臣卽當以軍法從事以嚴紀律而固軍心見已由恆福兩次給與該夷照會儘從此就撫事機固順如或再肆猖獗該大臣督軍擊退則津郡與京師皆可無虞震動萬一事機緊急該大臣總當恪遵硃諭斷不可因執己見諒該大臣必能

仰體朕心勿專以大沽爲重置京師於不顧孰輕孰重又何待朕
屢次諄諄訓諭也○諭周天受奏旌德等處賊匪竄犯甯國郡城
被圍急盼援師一摺據稱賊匪兩萬餘人由旌德涇縣分路竄撲
甯國府城該提督派撥官軍分投迎擊疊次鏖戰賊勢不衰見在
府城被圍情形危急請速派援師等語甯國爲浙江屏蔽儻有疏
失則蕪湖等處之賊得與蘇常聯絡剿辦愈難著手曾國藩已抵
祁門著卽調派勁旅開道前往甯國與周天受內外夾擊藉解城
圍並責成領兵將弁星速遄行毋稍遲誤其蘇常等屬應如何速
籌進剿一俟鮑超等到營並著卽行籌辦將此由六百里諭令知
之○諭周天受奏江蘇金壇縣城自四月初一日被圍經總兵蕭
知音參將艾得勝周天孚署知縣李淮督率官紳民團嬰城固守
至今數月並無一旅之援請飭援救等語金壇縣城以彈丸之地

界連常州等處四面皆賊該文武將士紳民深知大義堅守待援至數月之久效死勿去必得迅速援救俾忠義自效者得以固全方可激勵軍民之心前據辭煥奏稱已咨商總兵馮子材派兵前往見在該總兵是否業已派兵往援著巴棟阿迅卽添派勁旅兼程赴援力解城圍將此由六百里諭令知之○諭本日據張芾奏旌太逆匪糾黨圍撲甯國府城浙西賊竄偏徽界並據周天受奏甯城被圍困守待援各一摺旌太等縣賊匪糾合大股圍撲甯國府城該提督登陴守禦疊次出戰均有斬獲而賊勢仍不少卻甯郡爲江南上游地勢最關緊要江長貴於廣德防內派撥之援兵二千數百名計亦不久可到著周天受一面嬰城固守一面激勵士卒先就見有兵力會合江長貴所派之兵四面夾擊並著張芾派撥得力兵勇前往救援以期迅解城圍其宜興股匪已竄於潛

昌化偪近欽東並著張芾派撥將弁督兵實力堵剿毋令蔓延將此由六百里各諭令知之○命江西浙江湖北湖南各督撫籌撥餉銀軍火解赴皖南軍營並命浙江巡撫王有齡速派大員接辦甯國糧臺○予安徽陣亡參將廖榮陞等祭葬世職○甲午子廣西陣亡參將劉文彬祭葬世職建祠○命撥張家口稅銀一萬五千兩接濟直隸軍餉○乙未諭內閣崇實奏查明撤任知府訐告上司各款分別定擬一摺前因曾望顏奏撤任知府翁祖烈臚列八款訐告當諭令崇實秉公查辦茲據奏稱查明原訐各款內勒索規禮一節據各州縣辦差家人俱堅供並無其事惟該署督自陝入川所帶人數眾多於丁役人等不加防範以致浮言盈耳所稱盤查銀庫僅看銀三封餘概免盤並收受規費折乾一節該署督盤查藩鹽兩庫因銀數較多並不抽查僅看零銀三封實屬草

率翁祖烈因夔州府知府羅升楮差解四廳經費銀六千兩至督署投遞遂疑該署督有收受規費情事所云水禮折乾亦不能指出實據所稱敘嘉軍務日緊該署督畏蒞不前一節上年滇匪上竄敘嘉一帶該署督業經奏請親往督剿到省後因近省土匪蠕動復奏請在省坐鎮以致日久無功雖非意存畏蒞實屬坐失事機所稱川省吏治因循該署督札諭屬員乃既稱確切查明復云姑寬既往一節該署督雖無私心實係前後詞意矛盾致翁祖烈得以藉口所稱武備廢弛廣招咽喉匪滋事一節據崇慶州金堂縣稱係奉防剿局札飭不盡由該署督之意但該署督身任總督豈得諉爲不知所稱搬移防剿局並派陝西候補知府田良在局及爲富順縣知縣胡汝開鋪張勞績一節訊據防剿局向設藩署該署督改移皇華館以便親自稽查田良入局尙無把持等弊惟該

員向來聲名平常該署督未免輕信偏任胡汝開以帶勇擅長該署督將其記功旋因防剿不力卽予奏參尙無不合所稱該署督不按定期放告遇停刑日發交印封一節雖爲公事認真起見究與定例不合至縱子干預公牘並串通家丁在外招搖一節訊因該署督年老健忘遇公務紛紜往往令伊子曾捷魁存記批發稟件或令代筆以致物議譁然疑有賄屬關通之事家丁張喜呂義亦無串通舞弊情事惟該署督既信任伊子家丁張喜呂義等皆係年輕浮動訊無招搖殊難憑信曾望顏身任總督大員不能整躬率屬種種荒謬又信任其子不能嚴加防範因而家人藉勢招搖致招物議實屬咎無可辭前已因案革職暫畱四川總督署任著卽行革任仍畱於四川聽候另案查辦翁祖烈以屬員訐告上司雖訊非無因乃砌詞列款肆行詆毀此風斷不可長著卽行革

職永不敘用以示懲儆張喜呂義著杖一百枷號一箇月遞回廣東江蘇各原籍折責發落調任成都府知府楊重雅布政使祥奎鹽茶道韓錦雲前任夔州府知府羅升梈查無賄屬代辦臬司及致送規費等情均著無庸議川省陋規前已明降諭旨永遠裁革地方官狃於積習難保不潛行營私相沿不改此案雖無確據實難保其必無嗣後地方大吏各宜自飭廉隅以爲表率庶幾源清流潔大法小廉不至爲屬員挾制訐告之風亦可永息務當激發天良痛懲前轍以副朕澄敘官方之至意○諭崇實奏隨營知府被控重情並見任知府徇私舞弊請分別嚴辦一摺據稱四川撤任知府翁祖烈呈出田良幕友邵桂芳稟詞控告田良捏報冒功縱賊殃民所有各款虛實亟應徹底根究邵桂芳於該大臣行抵川省時卽向行館投遞呈詞經成都府知府楊重雅向候補知縣

鍾瀚假稱借閱擅行懷去顯係意存寢息陝西候補知府田良著革職拏問交崇實東純嚴行審辦並緝提邵桂芳到案對質楊重雁密一併撤任嚴究以成信讞○諭軍機大臣等本日福濟奏甘省要政亟宜練兵裁冗足餉養鋒以除糜費而防飢噪一摺甘肅地處窮邊額兵甲於直省歲須各省協餉甚鉅近年撥解維艱於咸豐五年議准餉銀每兩按時價折八錢五分仍緩發二成先發一成茲據奏稱所發餉銀實數止得一半猶有短欠遲支不能按季士卒枵腹時有出伍辭糧陽爲求餉陰謀鼓噪之事以致曠操違令該管官亦無如何設兵無以爲養多兵反足爲害若不及時裁冗恐有尾大不掉之患第裁之不可太驟必須辦理得法陸續汰其老弱畱其遺缺積之年餘可去三分之一然後將所畱二分勤操練習悉成勁旅庶幾裁冗卽以練兵糜費可除於見在養鋒

先期足餉飢噪可防於未然卽文武各官厯年添設不少冗員亦應隨時裁改以省枉費等語著樂斌林揚祖卽按所奏情形悉心體察斟酌妥議覈減務須兵能日贍餉不虛糜以期有備無患另片奏甘省兵餉除地丁釐金協款外惟倉糧尙屬有餘可資搭放如甘涼肅等處月放銀麥各半惟西甯倉多豌豆陳陳相因易致黴變其他縣亦有應存三四萬石至十餘萬石者該管道府縣目擊飢兵困苦且恐或生覬覦酌量准借抵放而藩司拘於成例責令籌議扣還上下相持有名無實等語並著該督督同藩司查明各州縣實儲新舊倉廩除應畱各營例支本色外其餘存糧各就地方情形於見領二成餉銀之外酌量搭放並將各兵所借之糧統俟協撥充裕餉銀全領之時再行陸續按季扣還是否可行有無窒礙之處一併詳細查明妥議具奏將此諭令知之○諭前諭

會國藩侯左宗棠李元度鮑超張運蘭等到齊分道進兵規復蘇常茲據王有齡奏逆匪竄入於潛後復東竄貴芳橋離臨安四十里地方風山牧停村等處均有賊蹤勢將內犯省城防剿均難請飭該大臣迅速赴援等語逆匪盤踞於潛東可達臨安餘杭南可達新城分水桐廬均可內犯省城若占踞嚴州則江西福建餉道不通援兵隔絕杭城亦爲坐困省城兵勇雖有一萬數千能守而不能戰該撫接據探報並盤獲奸細有四眼狗陳逆由蘇糾合賊黨五六萬欲竄杭湖又思先取徽甯之語省城萬分危急會國藩見已馳抵祁門若由此入徽卽由淳安嚴州轉戰而東先將此股逆匪剿除則皖浙可以保全然後進兵削平江蘇諸郡縣庶大局可以挽回如會國藩尙未能督兵前往卽著催調張運蘭鮑超等迅速到齊兼程前進以顧全局將此由六百里諭令知之○僧格

林沁等奏接得英佛照會言詞桀驁意將全力攻撲大沽及兩岸礮臺見復占踞大小梁子奏入命由軍機處擬出照會交文俊等轉達僧格林沁等固守礮臺悉力抵禦○官文胡林翼奏准都興阿恭錄諭旨催調兵勇臣等查湖北征皖各軍多隆阿舒保分爲兩路每營馬隊不過千名其中尙有不得力者除已撥給都興阿二百九十餘名外爲數無多外謀皖境內顧楚疆實屬不敷策應何能再行抽撥至湖北步軍均係湖南勇丁勇與兵異非自行招募則將與勇不習難期得力且皖北楚軍除蕭啟江六千人派援四川不計外蕭翰慶之援浙曾國藩之謀吳分去一萬六千餘人兵勇分布實形不足臣胡林翼派員回南招募新勇總須八九月後乃能到防安慶桐城潛山英山霍山等處兵力實虞單弱其漢陽黃州德安三府尤屬空虛見據各路探報賊首偽輔王楊逆率

大股四萬餘人循南岸而上意在過江鈔我兵之後賊目偽竇天
義偽則天義偽乘天安等率眾二萬餘人已至和州四眼狗陳玉
城已至廬江該逆等妻孥畜產盡在安慶城中勢將剋日分股來
撲是楚北皖北之情形萬分危迫且據蜀中探報首逆石達開見
已由粵西竄黔省攻陷廣順州城將謀五路犯蜀四川滇匪尙肆
何堪再有石達開之擾萬一川省有警則湖北居其下游荆宜一
帶尤須防守此湖北馬步兵勇萬難分撤之實在情形也都興阿
雖骸疾尙未全愈而帶兵多年誠如 聖諭該將軍久歷戎行曉
暢兵機正可借資調度不必衝鋒陷陣親臨前敵該將軍自應遵
旨馳赴揚州督辦堵剿聞揚郡舊有馬隊約千人都興阿到後卽
可奏明歸該將軍統帶是馬隊一項不慮乏人調遣而李若珠所
帶步隊各營亦盡歸其節制堵剿均可兼資如必欲攜帶步隊前

往或由該將軍自行委員招募一二十人以資調度得旨近又有
寄諭仍飭籌撥官文等自應懍遵該將軍雖不甚習於步隊已有
旨飭令另派大員隨同都興阿管帶○命防堵山海關正紅旗漢
軍副都統增慶將調赴山海關之吉林黑龍江官兵一千三百名
交副都統格綢額管帶馳赴大沽聽候調遣○命直隸山東山西
陝西各將軍督撫都統副都統將前調馬隊官兵派員管帶馳赴
通州聽候調遣○命長蘆鹽政寬惠等調防守天津官兵並郡城
練勇赴大沽防剿○以冒功糜餉撤四川提督占泰任並逮問○
丙申諭軍機大臣等昨諭令寬惠崇厚迅派兵勇救援大沽後路
本日復明降諭旨令焦祐瀛張之萬回籍激勵民團招集義勇會
同堵剿天津百姓素稱好義諒必同心協力踴躍爭先所需募勇
口糧必須豫籌接濟著寬惠崇厚不論何款寬爲籌備准焦祐瀛

等先爲提用俾濟要需事竣由崇厚覈實報銷以清款目所有製
備軍火懸賞殺賊一切事宜均著照焦祐瀛等呈遞寄寬惠等信
函辦理該少卿等未到之先卽著寬惠崇厚督同天津府知府石
贊清及本地紳士先行籌辦並雇募勇丁不得招致無業游民以
防奸宄是爲至要○命光祿寺少卿焦祐瀛翰林院侍講學士張
之萬馳驛回籍辦理團練○丁酉命協辦大學士戶部尙書周祖
培兵部尙書陳孚恩工部左侍郎潘曾瑩右侍郎宋晉會同五城
御史辦理團防○戊戌諭內閣前因御史陳濬奏參監司大員棄
城潛逃當降旨將蔡映斗等拏問並將吳雲先行革職飭薛煥確
查如先期並無札委卽行拏問審辦茲據薛煥奏稱已革署蘇州
府知府吳雲先期出城確係奉有前江蘇巡撫徐有壬印文札委
並呈出令箭令旗等件尙無捏飾情事吳雲業經革職著免其拏

問○諭全亮慶雲奏賊勢漸蹙擬撤省城防兵一摺滇匪竄入四川屢圖上犯省垣經全亮等揀調滿洲營馬步官兵分駐城外扼守見在楚軍會合川省兵勇分路進剿連日獲勝并研解圍成都所屬地方亦一律安謐所有防守省城滿洲營官兵著卽裁撤歸旗以節糜費○諭軍機大臣等辭煥奏近日各路軍情請飭統兵大員派兵馳援一摺據稱蘇省自松江克復後餘匪復陷嘉定進踞南翔鎮招集附近土匪圖竄上海青浦縣踞城逆匪距上海密邇雖經兵練攻擊未能得手滬城兵力甚單請速催會國藩瑞昌督師赴援等語已諭知瑞昌王有齡飭張玉良迅派勁旅三千馳赴滬上矣會國藩見移營暫住祁門縣境擬俟新募楚師到齊始由徽甯進剿昨因蘇省逆匪由浙省長興孝豐一帶竄至於潛縣境甯國郡城又有大股逆匪數萬攻圍甚急已諭令會國藩派兵

迎勦進解甯郡之圍此時浙省皖南軍情喫緊會國藩勢難兼顧
蘇省薛煥惟當俟浙省援師到後力圖攻克青浦嘉定二城會合
民團進圖蘇郡並速行鼓勵常熟民團克復江陰城池以斷賊匪
渡江北竄之路將此由六百里諭令知之○僧格林沁等奏初五
日卯刻洋人馬步萬餘攻撲石縫礮臺因藥庫被然以致礮臺失
陷提督樂善登時陣亡見擬督帶重兵扼守通州 上諭該大臣
等見擬酌量退撤再圖決戰實能顧及大局聞之稍慰惟通州爲
京師屏蔽而天津實爲通州門戶若非力扼天津恐通州亦難安
堵此時海河防具層層密布想船隻尙難立時闖入且津郡城外
築有壕牆尙堪扼守著僧格林沁等將大沽兵勇一面撤退一面
前赴津城將海河兩岸及郡城守禦事宜督飭寬惠等妥爲籌畫
後再赴通州未可因該處水陸受敵置之不顧瑞麟於初一日始

往通州其天津後路以至通州一切布置應如何相度要隘擇要嚴防調撥兵勇分投堵紮以臻周密之處均著該大臣等妥爲辦理○文俊等奏接到佛國照覆必欲 欽派全權大臣方肯會晤

命恆福再給與照會○瑞麟奏通州設防情形命派撥京兵於城外擇要駐紮○命杭州將軍瑞昌等撥兵三千名馳赴上海交巡撫薛煥調遣○予江南陣亡從九品馬善等祭葬世職○乙亥諭軍機大臣等前因會國藩毓科奏請起用告養回籍道員沈葆楨辦理廣信防務當諭慶端等飭令前赴江西並將該員補授吉安贛甯道員缺茲據慶端瑞璜奏該員因親老多病家無次丁未能遠離已准其終養開缺惟此時皖南浙江賊氛蔓延江西廣饒一帶防務均形緊要所有帶勇督團撫綏地方各事宜亟須得力人員辦理著會國藩毓科會同商酌卽揀派熟悉地方情形素稱得

力之員前往廣饒一帶辦理防務以固邊圉將此由五百里各諭令知之○庚子諭軍機大臣等據僧格林沁奏天津無可守禦見往蔡村候旨並見擬調兵固北面之防自請治罪各一摺天津既無可守該大臣擬於通州迤南屯紮將天津礮位及在防官兵撤至通州並將山海關馬步各兵一併交增慶帶往所籌均尙周妥卽著照所議辦理其通州河西務原駐各兵無庸撤回京師該大臣將所帶官兵畱於通州駐紮卽著迅速來京面授機宜再行回至防所節節向前布置以衛京師○諭本日據慶廉奏統籌堵剿皖捻大局須合力兜擊分路進攻一摺捻匪張落刑等大股蔓延宿亳蒙懷廬壽一帶及豫省邊界江蘇山東河南三省屢遭蹂躪此擊彼竄總未能痛加懲創豫省兵力僅分路扼防不足以資攻擊該撫請飭袁甲三傅振邦等移兵分路扼剿自係爲通籌大局

起見袁甲三見攻定遠已將得手著卽分撥得力之軍環擊澮北各賊圩直擣東南要害傅振邦俟袁徐二圩攻克後卽從東北一路規取賊巢並著慶廉力扼商鹿邊境節節進紮以圖臺北各圩其苗沛霖分紮宿南之軍著袁甲三飭令就近移紮蕭永邊境與扼守永城商鹿等軍互爲聲援力扼西北進剿東南如遇大股紛乘卽當力挫兇鋒不得稍分畛域如此三路兜剿同時並舉定可制賊死命埽穴擒渠該大臣等務須同心共濟以期早殄逆氛將此由六百里各諭令知之○諭見在金壇情形危迫著巴棟阿仍遵前旨卽行飭令馮子材迅速進攻並嚴飭該道府等趕緊籌辦器械糧餉毋得遷延貽誤致失事機鎮城防守事宜亦應加準備勿令賊匪得以窺伺句容丹陽常州無錫蘇州各處賊匪麇聚日多既有秋冬回竄之信尤應加意嚴防巴棟阿務宜督飭各軍聯

絡師船水陸堵截毋令逆匪渡江北竄益致蔓延將此由六百里諭令知之○命大學士桂良馳赴天津會同直隸總督恆福辦理夷務均授爲欽差大臣○以科爾沁親王僧格林沁辦理海防未能周妥革去正黃旗領侍衛內大臣鑲藍旗滿洲都統並拔去三眼花翎○予天津陣亡直隸提督樂善祭葬世職建祠諡威毅○辛丑諭軍機大臣等本日據文俊等奏稱前由軍機處擬定照會底彙已照錄送往未按照覆等語上次軍機處所擬照會係令該使臣來京面議尙在大沽未經撤防之先見在情形不同已令桂良卽日馳驛赴津應令該使臣在津靜候會同辦理著恆福等明晰知會勿致稍有疑惑本日復據恆福等奏英兵已入津城等語該督接見巴酋其意總以未經派有欽差不能停止干戈爲詞桂良候領欽差大臣開防卽日啟程約十五日必可到津已由桂良

擬就照會著恆福轉交該使臣俾知桂良剋日可到以免再有疑
慮恆福恆祺均著居住城外以便與桂良面商一切○諭瑞昌等
奏於潛大股賊匪疊陷臨安餘杭二縣並由餘杭竄僞省垣雖經
總兵劉季三一軍擊退而省城兵勇能守而不能戰張玉良攻剿
嘉興之軍正在得手亦難撤調福建江西之兵雖經催調到尙須
時待援情形自屬非常緊迫著會國藩仍遵前旨迅速取道入徽
卽由淳安嚴州轉戰而東先將此股逆匪撲滅保全浙省再圖規
復江蘇諸郡設或該大臣不能親往亦須先派得力之兵前往救
援以冀挽回大局再據王有齡片奏連日探得蘇省逆賊紛紛北
走終日水陸不絕且據團勇奪獲賊匪僞文內有賊目李侍賢尙
在蘇城盼望其黨速往省垣之語蘇城賊勢單薄似乎可信著會
國藩乘此機會應由何路進兵迅圖規復地方仍遵前旨體察情

形迅速辦理將此由六百里諭令知之○諭前有旨令東純兼署四川總督一切剿匪事宜均歸節制矣本日據全亮等奏提督占泰膜視軍務致令大股逆匪全數逸出竄至邛蒲新津等州縣窺伺省垣辦理軍務之知府田良由營潛自回省占泰又稱患病以致百姓搬移人心震動各等語是川省情形業已緊迫異常曾望顏既經革職全亮等所統滿洲營官兵爲數不多又恐呼應不靈未足以資守禦著東純迅速前進馳抵成都會同全亮等籌商攻剿之策該署督身膺疆寄責無旁貸務須整飭戎行激勵將士迅掃賊氛不得稍涉遲緩致誤事機前因提督占泰冒功糜餉業經撤任知府田良被控縱賊殃民業已革職拏問均交東純會同崇實嚴行查辦此次田良潛自回省並占泰玩誤捏病各情著一併訊明具奏毋稍徇隱將此由六百里諭令知之○賞還已革廣西

提督張玉良頂帶幫辦杭州將軍瑞昌軍務○以鄧爾恆爲雲南

布政使花詠春爲雲南按察使

由糧儲道遷

○壬寅諭軍機大臣等據

僧格林沁奏遵旨將所帶官兵畱於通州駐紮先派員齎招來京

一摺此次該大臣將馬步官兵撤退駐紮通州係遵奉諭旨通籌

大局起見並非督剿不力該大臣威望素著能得兵心自應仍領

欽差大臣關防會同瑞麟總統諸軍辦理防務妥籌布置以期保

衛京師見在通州一帶防堵喫緊要隘處所官兵恐不敷分布所

有瑞麟伊勒東阿統帶前往之京營官兵一萬四千名著暫畱通

州扼要設防俟各處所調之防兵到齊後再行體察情形酌量抽

撥回京其所調防兵均歸僧格林沁瑞麟統帶至通州洩水挑挖

引河務須趕緊籌辦是爲至要○命武備院卿恆祺爲撫夷幫辦

大臣○命直隸布政使文謙將天津寄存藩庫餉銀二十餘萬兩

迅解通州撤順天原設糧臺均歸天津道孫治經理並另撥銀三萬兩解交光祿寺少卿焦祐瀛等辦理團練○予江西陣亡從九品魏深清等祭葬世職○癸卯追予浙江陣亡道員蕭翰慶等祭葬世職○甲辰諭軍機大臣等前因蘇常等處失守當諭瑞昌王有齡將所調各軍酌派赴援茲據薛煥奏青浦官軍失利松江府城復陷上海情形危迫請飭督師大臣兼程援救等語松江復失與青浦以上逆氛聯爲一片嘉定之賊分竄羅店地方勢將撲犯寶山上海爲餉源所繫賊所注意見在三面皆賊存城兵勇無多實屬萬分危迫前諭曾國藩自嚴州轉戰而東目下將弁兵勇是否調齊當此事機緊迫之餘該大臣務當設法探明道路兼程前進急攻蘇松各城使該逆回兵救援以解上海之危瑞昌因宜興之賊直犯餘杭逼近省城未能前進見在滬城危急著該將軍卽

於馬得昭彭斯舉吳再升饒廷選四員中酌派一人統帶精銳四
五千人前往救應營中如尙有廣勇毋庸派往並飭帶兵之員不
得遲延觀望致誤事機本日復據張芾奏逆匪環伺甯郡援絕兵
單城圍未解等語賊圍甯國愈聚愈眾周天受激勵飢軍誓以死
守情形亦甚緊迫前經諭令會國藩調派勁旅問道前往應援著
仍遵前旨分撥兵勇派委得力將弁迅速統帶前進以解甯國之
圍將此由六百里加緊各諭令知之○諭薛煥奏松江復陷上海
危急請催兵將赴援一摺逆匪潛赴崑山蘇州糾約大股復將松
江府城攻陷上海逼近兇鋒該署督調派兵勇分籌堵禦尙屬周
妥前飭瑞昌派兵赴援本日復諭令會國藩趕緊援剿並催令瑞
昌等派員統帶精銳赴上海援應著薛煥迅速迎提一面飭催會
秉忠長龍船赴滬助剿一面督率員弁竭力固守以待援兵毋稍

疏虞前據巴棟阿奏六月間有夷船一隻入江上駛問係英吉利
船由上海前赴金陵傳教至今未回復據王有齡奏搜獲逆目僞
文有洋人兄弟來降之語本日薛煥摺內亦稱洋涇濱夷房牆壁
黏貼僞示著薛煥派員設法離間將此由六百里諭令知之○諭
張芾奏甯國郡城兵單援絕勦辦棘手情形一摺自旌德太平敗
匪糾合涇縣蕪湖賊黨進圍甯國府城增築逆壘偏攻甚力周天
受登陴誓守飢踣之卒蹶然奮興屢次襲毀賊營賊卡並選精銳
下城奮力攻勦疊有斬獲而賊圍益堅又諜聞紅楊樹踞匪將復
併力來犯我軍困守二十餘日雖屢戰輒勝恐兵疲餉竭久將不
支各路官軍自應竭力趕緊赴援雖據奏稱江長貴已催令江長
泰所帶三百人會合張芾所派護餉前往之守備倪開試等四百
人繞道入城兵力尙形單薄曾國藩近在祁門前已有旨諭令調

派勁旅間道前往甯國與周天受內外夾擊以解城圍本日復諭
迅撥兵勇就近赴援其浙江報撥甯餉到徽卽著張芾加派弁兵
多速轉解前往以固軍心其摺中所稱賊偏甯國北門意將斷我
糧道米與朝甫離廣德五十里卽頓兵不進且師行十日未出百
里等語似此恇怯無能自應嚴行指劾並著張芾速將該革鎮逗
畱各情據實嚴參毋稍容隱將此由六百里諭令知之○督辦河
南團練大臣順天府府丞毛昶熙奏統陳團練辦法並酌擬條規
一添築堡寨以扼要隘一講求險要以便堵禦一慎擇首事以資
統率一分選團丁練丁以備訓練一攤捐練費以備公用一互爲
救援以資聯絡一申明號令以一眾志一嚴定約束以禁頑暴一
公賞罰以示勸懲一嚴察奸宄以防內應一旌忠義以作民氣一
事貴實力奉行得旨所議條規均屬周妥照議辦理○乙巳諭軍

機大臣等前因通州一帶防堵喫緊當諭令僧格林沁等於要隘處所嚴密布置並添調直隸等省官兵歸該大臣等調遣尙恐不敷勦辦所有卓索圖哲里木昭烏達三盟兵丁除已調赴軍營外其餘是否尙堪續調著僧格林沁體察情形或每盟各調一千或各調二千卽行酌量具奏並斟酌駐紮地方見在通倉米石本擬運至京倉惟轉運非易趕辦尤難若卽以此項米石覈算兵丁應得口糧估計時值於餉需內搭放數成既可節省實銀且尤便於兵食於經費較有裨益著僧格林沁等悉心體察妥議具奏至順天糧臺見旣歸併孫治一手經理無論銀米及搭放款項均應與天津糧臺一律支發以昭平允由津至通各要路多設巡卡嚴密防範來往行人亦應認真盤詰前由張家口解往之要犯關四並由京解往之于七及潘志和三犯曾否審有端倪該犯等見在羈

禁何處著一併覆奏○諭文煜奏江浙漕船收進俚島等語江浙漕船三隻共裝漕米四千七百三十石因洋面未靖暫行收泊山東俚島口內著文煜派員確切查明此項漕米如今在船停泊是否不至微變抑或於附近地方暫行露囤俟海防事竣再行運津兌收該撫卽體察情形妥爲辦理將此諭令知之○命戶部續撥餉銀十萬兩解赴通州糧臺○以通州辦理防務命直隸河南山西各督撫將備用軍械迅速解京○賞已革大學士賽尙阿五品頂帶交欽差大臣僧格林沁軍營差委○前工部尙書文彩卒于祭葬諡安恪○丙午 硃諭惠親王等僧格林沁勤於王事朕深廬念况近京一切布置更必日夕勤劬著惠親王等前赴通州傳旨詢咨僧格林沁防守情形並著僧格林沁激勵兵心以期有備無患○諭內閣周祖培等奏籌議團防章程酌擬條款呈覽一摺

京師爲首善之區周祖培等辦理國防自應實力奉行務使宵小潛蹤善良安堵以期人心靜謐所擬章程各條均尙妥協著卽照所議會同五城御史悉心妥籌辦理不可有名無實其設立公所等一切經費著照所請由該尙書等先行倡捐如有情願捐貲報效者並准由該尙書等奏請獎敘以昭激勸○諭軍機大臣等喬松年奏金壇被圍日久請將守城文武先行優獎等語金壇文武力守孤城數月之久深堪嘉尙參將艾得勝知縣李淮著巴棟阿先行查明奏請優獎其隨同守城出力之官紳兵勇一併查明先行奏請優獎以示鼓勵將此由六百里諭令知之○命給事中吳焯辭書堂御史楊榮緒徐啟之郭祥瑞劉有銘朱潮辭春黎任兆堅白恩佑幫辦五城團防○丁未諭內閣曾國藩奏平江縣城捐建忠義祠懇請列入祀典一摺湖南平江一縣地當江鄂之衝自

粵匪滋事以來四鄰皆陷一邑獨完計自守界禦賊出境荷戈前
後力戰死事者約二千六百餘人洵屬忠義可嘉允宜特予褒榮
用光祀典該大臣請於該縣捐建忠義祠將贈太僕寺卿何忠駿
等分別奉祀遴派公正紳耆經理祭田均著准其照辦並著照各
府昭忠祠及湘鄉縣忠義祠之例列入祀典地方官春秋致祭以
妥忠魂而彰蓋節○會國藩奏臣自行抵祁門後王有齡催臣赴
浙瑞昌催臣由浙赴嘉興而甯國被圍緊急張芾屢函屬臣撥兵
赴援臣以所部萬人皆係新募之卒未經見仗不敢輕於一試又
以鮑超爲水所阻尙未旋鄂朱品隆患病未痊不能帶隊張運蘭
雖入江西境內毓科咨畱袁州以防南贛之賊臣以不援則甯國
有坐困之勢赴援則統將無可派之人正在萬分焦灼忽於六月
二十九日接到瑞昌咨稱賊偪杭城當經調集各軍奮力擊退奸

匪供稱賊股回竄徽甯又接張芾函開甯國亦獲勝仗協餉已於二十四日送入府城臣前奏八月進剿欽奉恩旨俞允今浙江倭城之賊業經擊退若鮑超等陸續到齊甯國保全無恙當可與初次原奏相符至進兵之路凡浙中來信皆勸臣先赴杭州注重嘉興凡江北來信皆勸臣先攻池州注重蕪湖欽奉諭旨飭臣斟酌辦理以臣愚見由杭嘉以至蘇州處處阻水兵從一路而入必難得手目下張玉良三萬餘人頓兵一面已屬失勢若臣與瑞昌再以重兵繼之愈覺窘束而不能施展不特進攻蘇州毫無把握也不若待兵將調齊察賊勢最重之處疾趨而痛剿之至諭旨垂詢徽甯軍務能否兼顧一節臣入徽境已逾半月畱心察訪張芾自咸豐五年籌辦徽池防務屢挫賊鋒使不至深入浙境於大局不爲無益惟所部各軍紀律太寬近日多住民房攜帶婦女張芾於

各嶺設卡之處並未親出查閱一次卽徽州城守之具亦無豫備
觀其軍心之懈實已難期再振周天受向以能戰著名本年二月
不能扼守廣德致有杭州之變三月不能扼守建平致有東壩之
失徽甯兩防厯年取用浙餉約計千餘萬浙中恃爲長城故本省
別無防守之師一旦藩籬盡撤任賊長驅杭人慘遭浩劫百物蕩
盡以故浙江官紳士民莫不痛憾周天受貽誤大局而張芾有督
辦之責亦當分任其過諭旨以賊匪入浙張芾咎無可辭臣固不
敢爲之寬解也臣與張芾在京素識近來同厯戎行書問常通稔
知該員學養深沈操行廉正尙爲老成宿望惟治兵非其所長用
人或受蒙蔽應如何位置得宜之處聖主自有權衡非臣下所
敢妄擬已革提督周天受貽誤浙省情罪較重惟從前打仗出力
見在甯郡被圍尙能督率將士忍飢困守其胞弟周天培亦以忠

勳殉難可否將周天受仍畱臣營差遣以觀後效出自聖主鴻裁至徽甯池太等府處處與江浙毗連地方遼闊袤延七百里一片逆氛幾無尺寸完區臣軍調募齊備人數不滿三萬正當狂寇壓境之時不敢自信調度得宜漸有起色惟係臣兼轄地方且目下駐師將來進兵皆不離乎皖南自應力籌兼顧責無旁貸特是徽甯兩防兵數尙眾錮習已深舊欠過多新餉尤缺不裁汰則口食無資一裁汰則變態百出辦理棘手一言難罄臣才力短絀深恐弗勝如奉旨歸併臣處督辦臣兼顧皖南卽斷不能更顧浙江上諭軍機大臣等前因甯國被圍緊急並浙江於潛之賊竄逼省垣疊經諭令曾國藩迅撥勁兵分道援剿本日據曾國藩奏稱該大臣旣顧皖南卽不能兼顧浙江浙省見在兵勇已有五六萬人前撲省垣之賊業經擊退卽著瑞昌等迅就見有兵力飭令帶

兵各員分途勦辦張王良向稱驍勇善戰並著該提督剋期攻復嘉興進規蘇郡毋得藉口待援遷延不進見在松江復失滬城危急前諭該將軍等派員前往救應並著迅速派往毋稍遲緩一俟上海得手即可會合浙師兩路進兵蘇城不難克復也將此由六百里各諭令知之○諭前據龐鍾璐奏常昭兩縣捐餉已竭請飭協濟當經諭令會國藩飭地方官就附近完善之區勸捐接濟本日復據龐鍾璐奏稱常昭兩縣已搜括無遺深恐團練飢潰請飭迅速寬籌等語蘇常迭陷以來常熟以蕞爾一隅民團齊心守禦屢次殺賊使三路之賊不能歸併一處若因餉竭渙散賊勢愈形猖獗勦辦甚難得手不可不急籌接濟以勵民心會國藩遠在祁門恐未能迅速籌撥著薛煥於該處設法籌款解赴常熟交龐鍾璐散給俾民團益臻踊躍該省餉需雖屬竭蹶惟民團心志齊一

足輔兵力之不逮較之招集潰軍徒糜餉項者尙爲得力毋令因餉竭潰散是爲至要將此由六百里諭令知之○諭本日據官文奏署四川總督東純在湖北途次病故一摺已令崇實署理四川總督矣見在滇匪竄擾逼近省垣又有石逆分股窺伺州境之信前有旨令駱秉章馳赴蜀中督辦軍務恐一時未能遽到崇實見在川省審辦案件該處情形諒應熟悉所有防剿事宜責無旁貸亟應整飭戎行妥籌布置毋許貽誤因循再蹈曾望顏覆轍其援剿川省之楚軍見歸江西補用同知直隸州知州王沐統帶剿辦甚屬得力該署督務當妥爲駕馭毋令軍心懈弛前因黔省軍餉四川欠解甚多曾諭曾望顏籌銀二十萬兩就近撥解復諭令東純於接署督篆後卽行籌解此時黔省軍情緊急盼餉甚殷著崇實仍遵前旨速行如數籌解毋得推諉致誤要需至已革提督占

泰等兩次參款並濮詒孫田良等各案前經諭令崇實東純會同查辦著該署督卽遵前旨嚴密訪查認真究辦毋稍徇隱將此由六百里諭令知之○劉長佑奏逆匪石達開上年自桂林潰竄後磨聚慶遠分陷各屬本年正月分股趨犯南甯思恩兩府屬竄至百色廳二月十四日分遣逆黨數萬直撲百色廳城總兵富順等激勵兵練悉力固守連挫賊鋒該逆兩次用地雷轟塌城垣十餘丈城內濠深柵密兵練復奮力迎拒賊不得入十五日兵勇出戰連焚賊壘十數座該匪敗潰死者不可勝計十六日逆黨石鎮常逃至塘茶村經團總李汝昭斃之石鎮吉黃潰生折回慶遠路過安定亦經該土司擒獲石達開之弟石達德先亦爲思恩府擒斬僞宰制曾廣依等復率眾數萬闌入泗城遂自泗城走西林西隆一帶四月初七日紮筏偷渡紅水江竄赴貴州興義府地界復撲

雲南廣南府城查石逆詭譎異常經過之處必分數路每路復分爲數起使官軍力不及防此次曾廣依入黔後石逆尙踞慶遠逆黨賴積新等陷河池思恩各州縣力撲南丹土州欲由此分道入黔經該土知州莫樹棠等集團堵截斃匪不下數千該逆勢不能支乃折回慶遠石逆遂率而南蓋欲繞道思恩出泗城尋曾廣依原路趨黔以窺蜀也請旨飭下四川雲貴各督撫臣遴派勁旅沿邊控制夾擊以杜續竄其前自羅融竄入永甯州境股匪查係石逆後旗部眾內亂殺其宰制余忠扶遂背石逆東走欲取道折回江西號稱數萬臣派革職副將謝永祐等於六月十五六等日連敗賊於瓦窯該匪乘夜徑走懷遠所屬小龍勝一帶臣已飭副將鄔世堂等各率楚勇前往追截臣查僞國宗石鎮吉自八年在福建與石逆分股竄陷廣東湖南沿邊各州縣至桂林始興與石逆

會合在賊中最爲獷悍石鎮常石達德皆該逆親信子弟兇惡異常均以次就戮足褫賊膽而振軍威 上諭本日據劉長佑奏石

逆分股闖入黔境見在督飭截剿一摺石逆詭譎異常凡經過之處必分其黨爲數路每路復分爲數起使官軍不暇兼顧得以肆行奔突若非合力兜剿不免有過此竄彼之虞著張亮基劉源瀚田興恕激勵各軍將竄入黔滇各股會合粵省兵勇悉數殲除勿畱餘孽並著遴選勁旅於沿邊一帶地方實力截擊毋令餘匪竄入四川酉秀敘永一帶尤爲黔滇入蜀要隘卽著崇實嚴飭防剿各軍認真巡探如有該逆股匪竄近川境之信立即派撥兵勇認真堵剿毋使擾及完善之區將此由六百里各諭令知之○以崇實署四川總督

由駐藏大臣署

○命張芾來京其軍務統歸曾國藩督辦

周天受交曾國藩差委○命署陝西巡撫譚廷襄將捐備軍餉四

萬五千兩迅解順天通州糧臺○予安徽殉難通判程枚河南陣亡協領依興阿等祭葬世職○戊申諭軍機大臣等本日據桂良奏接到英佛照會請旨遵辦一摺照會內稱總以天津通商賠償兵費爲退兵息兵之關鍵該大臣等前此給予照會所云無不可商者原指見面互相商辦並非直言允許見在仍須斟酌妥善俾無後患方合辦法桂良馳抵津郡與該酋等晤面如提及索賠兵費若能相機開導減去若干固屬甚善否則必不可減亦應與之言明寬定限期並由何項扣還庶可從容辦理至天津通商一層可告以不獨八年所定和約並無此條卽本年二月所要四款亦無此語況八年和約有牛莊而無天津原係以此易彼今何又多此款該國旣帶兵船不獨大沽天津民心驚疑卽商賈亦必裹足不前實與爾等無益如允許不帶兵船駐紮若欲建夷樓與不退

兵船無異亦不可允許總之賠費通商即使允准亦必將兵船退出海口方能定議換約其舟山煙臺二處亦均須退出始可辦理兩國既云和好必須以禮相待若占踞地方以兵脅和實非長久之道桂良等務當於羈縻之中仍寓挽救之意○諭本日據毓科奏逆匪由宜興間道入浙迭陷於潛臨安竄入餘杭直撲省垣見催副將文瑞等就近赴援並請閩省派兵援救各等語前因於潛逆匪竄偏省垣雖經總兵劉季三擊退而省城兵勇能守而不能戰曾諭曾國藩迅速赴援昨據該大臣奏稱兼顧皖南不能再顧浙江是浙江待援之師惟有福建江西尙可就近助剿前據慶端先後派令署總兵繼興等統帶兵勇援浙見在尙有千名未到著慶端瑞璣迅卽催令赴浙聽候瑞昌王有齡調遣毋得再有遲延並著隨時偵探浙江情形如兵力尙屬不敷卽著續行添調派往

援應毋誤事機將此由六百里諭令知之○己酉諭內閣裕瑞英
蘊奏浩罕輸誠納款一摺上年浩罕遣使額爾沁阿布都劉里木
進京朝貢經葉爾羌參贊大臣裕瑞據情具奏當諭該大臣將貢
物接收代遞乃該額爾沁不卽折回逗畱葉爾羌回城招集各城
安集延人等任意妄爲滋生事端於裕瑞豫備筵宴傳見時輒敢
喝令從人行兇刃傷弁兵多名被兵丁將該額爾沁拒斃並將同
謀之呼岱達伯塔爾等拏獲定擬罪名監禁並復令阿奇木伯克
將全案情形函致浩罕知悉茲據裕瑞等奏稱浩罕伯克遣額爾
沁捏斯密頂敏開前來並呈遞圖書自認錯誤仍求將貢物賞收
尙屬恭順可嘉自應俯如所請所有浩罕呈進貢物卽著該參贊
大臣等遵照前旨接收代遞聽候頒給敕書賞件並准其照舊通
商監禁之呼岱達伯塔爾等十五犯均著加恩免罪釋放卽交該

伯克自行管辦以示懷柔遠人至意○諭裕瑞英蘊奏審擬住站安集延回子聚眾阻擾並私隨安集延之內地回犯分別懲辦等語本年二月間喀什噶爾及英吉沙爾內地回子有私隨安集延回子糾眾聚住英吉沙爾所屬之別什蓋莊二城情事當經護理領隊大臣德祥分派回兵往拏住站安集延呼岱達額帕爾等輒敢聚眾阻擾傷斃回兵復沿途搶奪馬匹直奔卡倫綸希皮察克布魯特俾斯底克率眾兜捕將額帕爾等七犯擒獲其私隨安集延之內地回犯素皮蓋等二十一名亦經英吉沙爾回兵續行拏獲經裕瑞等審明定擬具奏安集延回犯額帕爾等糾眾拒傷回兵並搶掠馬匹等物本應從重治罪姑念此次浩罕額爾沁呈遞圖書仍請納貢尙屬恭順著准其仿照成案將額帕爾玉素普二犯畱於葉爾羌永遠監禁愛依提入則捏孜爾帕里完庫吐魯克

五犯畱於英吉沙爾永遠監禁其素皮益等二十一犯著查覈情
罪輕重分別懲辦希皮察克布魯特俾斯底克拏獲要犯甚爲出
力著該參贊大臣等酌量請獎○命前任葉爾羌參贊大臣理藩
院左侍郎裕瑞來京供職○以烏魯木齊都統常清爲伊犁將軍
○予雲南陣亡知府淡樹琪四川原籍建祠從九品周廷振等附
祀○庚戌諭內閣慶廉奏援剿鹿邑竄匪疊獲大勝一摺毫擒劉
狗雷彥等糾合馬步賊匪突竄鹿邑境內占踞萬集等處民寨圍
撲城池經該撫飭派總兵承惠等於本月初九日分路兜攻斃賊
數十名賊眾敗竄初十日我軍分起馳進萬集寨該匪列仗迎敵
經知府張曜王榮烈等督飭馬隊兵勇奮力衝擊斃匪五六百名
跟蹤追殺不計其數立將萬集寨克復參將馬春華等乘機進攻
趙集寨斃匪數百名亦卽克復其屯踞劉集及圍攻邱集之匪知

萬集趙村先後攻克紛紛潛逃經開保派令馬隊併力疾追斃賊二百餘名勦辦尙爲得手著慶廉卽飭該鎮將等乘機進擊毋任旁竄○諭軍機大臣等據劉源灝奏修文克復內竄賊匪大半擊退省城情形亦覺稍緩著田興恕探明省垣如可毋庸赴援卽可先辦粵匪務須迎頭截勦毋庸繞道入川至應需軍餉前經諭令四川先籌銀二十萬兩就近撥解惟川省見辦軍務餉源支絀恐一時不能全數解到著劉源灝先於本省設法籌措以濟軍食不得專恃鄰省籌濟停兵待餉致誤事機本日據工部奏黔省應解黑鉛久未批解請飭催陸續補解等語黔省應解黑鉛數年未據按批解到見在庫存無多海防緊要深恐貽誤軍需著劉源灝將咸豐二年下運起歷年應解黑鉛迅卽分批解部以資灌造毋再耽延將此由六百里諭令知之○以江蘇上海被圍命杭州將軍

瑞昌等迅速派員赴援再續派援兵以資策應並命辦理江北軍務福建陸路提督李若珠飭總兵曾秉忠統帶長龍等船飛速馳救○辛亥諭軍機大臣等據桂良等奏夷務急迫不得已將所求各款允准各摺片並據載垣軍機大臣等將桂良等所寄信函呈覽桂良等照覆英佛將所求各款概爲允許固係暫示羈縻然前屢降諭旨如天津通商及占踞海口斷不可允許該大臣不過因該酋不肯晤面起見如晤面時仍當設法挽救消弭此事萬不可以見在議撫任聽肆意要求漫無限制○加浙江黃巖鎮總兵官黃彬提督銜統帶江蘇鎮揚一帶各起師船○壬子諭內閣翁同書奏兵練收撫各圩一摺沙河兵練自攻拔程圩後聲威益壯經翁同書飭令苗沛霖等統帶得勝之師於六月二十六日進紮板橋集地方徧諭從前被脅各圩果能殺擒投誠卽准收撫當有展

清閼墮等處地方聞風響應各將從逆擒首擒斬獻功贖罪其餘附近大小各圩俱一律薙髮投誠於本月初四日齊至板橋集卽經苗沛霖妥爲安置旬日之間兵不血刃共收撫六十餘圩淝河以南漸就肅清辦理甚爲妥速布政使銜四川川北道苗沛霖著交部從優議敘以示鼓勵○焦祐瀛等奏遵籌團練事宜密爲布置擬在武清靜海二縣地方籌辦豫備迎勦尾迫之策奏入 上嘉其尙合機宜○癸丑諭軍機大臣等據桂良等奏接奉嚴諭瀝陳急迫情形並夷酋必欲先期進京各摺片天津通商一節前曾諭桂良等必須先令該夷將兵船馬隊全行退出海口議定每年來京幾次不可建蓋夷樓方准允許其應如何立定章程條款桂良等亦須奏明請旨聽候辦理斷不能卽予以蓋用關防憑據至先期進京之處卽當嚴詞以告見在條款尙未議定換約與否亦

尙未完巴夏禮遞欲先行進京其意何居顯非真心換約可知如謂觀看房屋將來議定條約後該兩國來京少帶從人自有一定章程豫備款待中國以誠信待人亦無所用其疑慮如條約未定斷不能允其先行進京其索賠兵費一節務須遵照前旨寬定期由廣東關稅分成扣還酌量妥議另片奏夷人搬入鹽政衙署經阻不允等語既係和好如何占踞官署應卽令其退出所有該署文案彙件事關緊要著卽設法移出妥爲收存儻有疏失惟該大臣等是問桂良等身膺重任旣不能設法挽回力圖補救而又怯懦無能徒以顧大局爲詞轉貽後患兩次諭旨已逐層嚴示該大臣等自應懷遵妥辦勿干重咎○諭據御史梁經先奏陝西刀匪回匪搶劫各案層見疊出該匪巢穴卽在蒲富臨渭四邑之交二百餘里一片遼闊並無城池雖渭南之下邽鎮臨潼之關山鎮

各設有縣丞職分卑小難資彈壓該縣等又以四邑交界互相推諉以致盜風日熾惟添設縣治庶緝捕責有攸歸下邳之地處四邑之中漢唐皆有縣治關山鎮亦尙有圍牆丞署若割四邑之地於該處改設下邳縣城修築較易而渭南臨潼兩縣丞即可裁撤至修葺城池衙署學校等項前有修華獄廟餘銀交商生息可以提取動用等語著譚廷襄察看該處情形是否可行並修築城池等經費有無窒礙之處詳細查明具奏將此諭令知之○命吉林將軍景瀉黑龍江將軍特普欽各揀訓馬隊餘丁一千名挑選獵戶一千名派員管帶並命西安將軍托明阿陝西巡撫譚廷襄飭催原調官兵均馳赴通州聽候調遣○甲寅諭內閣德楞額等奏官軍剿滅幅匪江南山東邊界一律肅清一摺江南山東等處幅匪於四月間勾結捻匪意圖內應經德楞額等親統馬步兵勇會

督地方各官極力勦洗並據記名副都統富爾琿等先後稟報各路拏獲匪首多名奪獲器械無算立將幅匪數千名全行勦滅邊界一律肅清辦理尙屬安速所有打仗尤爲出力之員著該副都統等保奏候朕施恩毋許冒濫○諭軍機大臣等龐鍾璐奏上海常熟情形危急請飭援救一摺據稱江陰逆匪於七月初間連日出撲向東焚掠見在賊蹤離常熟不過二三十里請飭江北諸軍速往援救等語江北防兵本不甚多近因馮子材帶兵由丹陽進援金壇李若珠撥兵二千名助勦嗣薛煥因上海危迫又調去勇五百名並長龍船全行援滬水陸各軍無可再撥勢未能兼顧常熟仍著龐鍾璐剴切曉諭紳民團勇竭力防勦一面督同知縣周沐潤等力籌保衛一面催令編修趙曾向速邀江北民勇前來救援其糧餉前經諭令曾國藩薛煥設法籌撥俟解到時妥爲散給

以資接濟至上海被圍甚急前諭瑞昌等迅撥精銳四五千名馳往應援諒已趕到仍著龐鍾璐隨時偵探俟上海圍解即可會同薛煥將各路援兵分顧常熟以杜賊氛將此由六百里諭令知之○諭李若珠奏派撥師船赴援上海並請上游師船迅速下駛以資防剿一摺據稱逆匪自復陷松郡大股竄至上海城外民團官軍多被衝散存城兵勇無多見在該縣三面被圍情形萬分危急業經派令都司姜德管帶練勇五百名駕船前往並派曾秉忠管駕長龍等船順流赴滬見在長江下游務須多派艇師節節防備請飭楊載福迅催上游師船剋期下駛兼顧南北等語上海爲江南餉源所自出且與北岸唇齒相關儻有疏虞關繫甚重曾秉忠一軍駐紮江陰靖江一帶原爲策應上下游而設見已全幫調赴上海則長江更覺空虛見聞逆匪有在蘇造船之說萬一乘虛而

入躬辦愈難得手前有旨令吳全美李德麟等統帶全部師船駛
往下游迄今未見東下殊屬延緩著楊載福查明該總兵等師船
是否江路梗阻抑係沿途逗畱迅飭不分晝夜駛赴下游聽候調
遣毋得再涉遲延致有貽誤將此由六百里諭令知之○命陝甘
總督樂斌挑選獵戶二千名派員管帶馳赴通州聽候調遣○予
天津陣亡委翼長阿克東阿祭葬世職○乙卯 硃諭惠親王等
中國以天下之勢而受累於夷廿載於茲戰撫兩難誠堪浩歎蓋
謀國者務爲長久之計應變者尤賴握要之圖朕不憚詳思夜以
繼晝恐召對時事有或遺因縷晰而細言之一大沽爲津郡門戶
門戶旣失則蓟爾之城已在該夷掌握通商一層許與不許等該
夷旣占礮臺及三岔河等處將來多集兵力止能野搏斷不能肉
搏與船礮爭鋒朕初意未嘗不善以桂良此次抵津不許津郡則

必戰引之深入決戰之後則明言新條不算仍引舊約如再不能則以津城通商換駐京一款斯則可矣今既經該大臣等已允通商止可就議條款暫示羈縻決裂之時將桂良等撤下或卽斥革辦到何地步再因時處置一索費一層多方要挾必遂其欲而後止無論二百萬不能當時付與卽有此款亦斷無此理一帶兵換約謂各有戒心不得不防若既經議撫何必擁兵若擁兵而來顯懷莫測卽使遷就進京必仍有斷難應允之條款彼時欲戰不能欲允不可況陸續潛來之夷隊雖有兵而不能阻煽惑依附之匪類雖嚴示而不能禁大患切膚一決卽內潰於心京師重地尙可問乎以上二條若桂良等喪心病狂擅自應許不惟違旨畏夷是直舉國家而奉之朕卽將該大臣等立寘典刑以飭綱紀再與決戰一巴曾進京一層兩國既經議和一切供給自應飭該司妥爲

籌辦何必先來踏勘況既來則不肯走與帶兵換約一事其害相等斷斷不能應許一津城大沽不能卽時退兵一屬旣經議撫則應罷兵豈有以刃加頸而索償之理況此條與賠費爲一事互相牽連不過再爲添償地步決裂之後亦可以向該夷索費爲消弭之法一決戰宜早不宜遲趁秋冬之令用我所長制彼所短若遲至明歲春夏之交則該夷又必廣募黑夷舉四國之力與我爭衡再句通髮逆遠近交攻支持頗覺費手以上各條竭朕心思手書示惠親王載垣端華肅順軍機大臣等辦法亦止能如此若別有良謀可再詳細面陳勿稍緘默○硃諭載垣穆蔭除面奉旨允許酌辦幾條外如再有要求可許則許亦不必請旨如萬難允許之條一面發報一面知照僧格林沁督兵開仗載垣等卽趕緊撤回扈駕○諭內閣王有齡奏請將已故道員卹典撤銷並將帶勇

逃出省城之員嚴議一摺本年二月間逆匪竄撲杭州省城前署浙江鹽運使金衢嚴道繆梓總辦營務偏執已見勘議株守不肯派兵出城擊賊以致省垣被陷實屬咎無可道所有該故員已得卹典著卽行撤銷繆梓之子候選同知繆植禮所帶勇丁先經內亂城陷時該員復行逃出著卽行革職以示懲儆○諭軍機大臣等本日據桂良等奏夷情危急懇俯允所請各摺片並鈔錄照會各件呈覽此次該酋等來桂良等行寓索看全權大臣等敕旨照會內復以桂良並無畫押之權爲嫌其意無非欲桂良等卽行允許遂其以兵挾和之計該大臣等仍當勿避艱難剴切開導中國所授欽差大臣卽爾國所謂全權大臣名異而實同如事屬可行亦不妨先允後奏事屬不可行亦不能一概應允前所謂無不可商者原係兩國彼此斟酌何去何從並非將爾國一面之詞悉行

聽從始謂之全權大臣也如天津通商一節桂良等業經允許必須議定條款進京後絕無增添更改之處方無後患如帶兵換約一節事屬萬不可行兩國既經換約即係和好何得又帶多人前來足見爾國猜疑未化儻不能相信桂良即可自許畱於天津俟兩國換約後再行進京以釋其疑況通州一帶見在駐有重兵爾國人眾前來必不放過因不放過而互相用武是釁由爾國所啓不得歸咎中國且通州非議和之地該處亦無議和之人如巴夏禮來京先行踏看一層已諭知僧格林沁該酋行抵何處即行攔回桂良等斷不可令其前來致令起釁至賠償兵費一節此間即使允許尙須行文廣東省湊撥展轉尙須時日斷不能以兩月爲期由京付給見銀以上各條該大臣等務須層層駁辯明晰開示以期漸就範圍方爲不負委任前派恆祺爲幫辦大臣原因其熟

悉夷情藉可往來挽救初不料其隨同桂良惟命是聽一籌莫展
至此次江蘇委員藍蔚雯等係薛煥專派爲夷務而來到津已久
亦不聞有一辭之贊巴夏禮亦係英國幫辦彼既可來我即可往
該大臣惟當飭令恆祺率同藍蔚雯等前往該會處設法勸導實
力挽回方爲妥善本日示惠親王等硃諭內第二三條著鈔給桂
良等閱看正在寄諭間據桂良等馳奏夷酋決意帶兵北上等語
桂良接奉此旨如該夷尙未北犯自應在津郡遵照所諭各層極
力挽回儻業已北犯卽不必再與議和照會○諭據景廉奏俄夷
貿易人等原由博羅霍吉爾卡倫行走茲據該夷咨請嗣後冬春
閒改由霍爾果斯卡倫行走與原定章程不符請旨遵行各等語
俄夷赴伊犁貿易人等向由博羅霍吉爾卡倫行走惟上年因積
雪難行曾經扎拉芬泰許其由霍爾果斯卡倫行走嗣後冬春閒

所有俄夷貿易人等著准其暫由霍爾果斯卡倫行走以示體恤但事關邊陲必須慎重以垂久遠著景廉查明該處情形以後如見有窒礙難行之處仍當奏明停止毋滋流弊將此諭令知之○曾國藩奏臣奉諭旨飭催左宗棠等到齊分路進兵規復蘇常一節查左宗棠之勇選練未齊聞須八月朔日始由湖南起程李元度擬於七月初帶勇由平江起程尙未報行抵何處鮑超因江水封峽不能行舟六月十六日始由夔州起程張運蘭六月二十七日行抵萍鄉適江西撫臣毓科以南贛有警札飭該軍暫紮袁州尙未接臣後二次飛催來皖之札屈指約計李元度張運蘭鮑超等到徽當在七八月閒左宗棠到徽當在九月中旬臣前奏由池州廣德進兵維時廣德有江長貴扼守我軍由此進攻冀與嘉湖各軍聯絡頃接張芾函稱竄杭之賊由安吉孝豐回撲廣德該州

城竟於七月初四日失陷江長貴不知下落賊必踞此要地使皖浙之師聲氣隔絕又甯國被圍一月雖經周天受督兵固守而賊仍未退據探僞輔王楊七麻子帶池州之賊將自北路往撲甯國新破廣德之賊將自南路往撲甯國甯郡糧少援孤竊恐周天受力難久支軍情變幻旦夕不同鮑超不能於六月趕到皖境既與臣原奏不符江長貴不能一日堅守廣德尤非臣意料所及目下皖南固危乎其危浙江亦防不勝防臣軍調齊以後須一攻廣德一援甯廣之間又須有一支重兵往來策應勢不能繞越皖境而徑趨蘇常此蘇常急難規復之實情也諭旨又念上海兵力單弱嘉興亦未收復一節前准薛煥咨函松江上海等處水陸兵數無多欲由張玉良處分撥三千人未知果調得勁旅否臣相距過遠援應不及近因浙西多事文報阻滯雖彼此各致數函均尙未接

覆書據探僞忠王李秀城帶領賊眾由金陵往犯上海頃聞松江

復陷上海舟師大挫危迫殊甚至張玉良嘉興一軍與臣處信息

罕通但聞二十九日地道已成礮塌數丈旋因賊眾堵禦未能成

功又微聞將帥不和文武不協相持過久恐生事變臣新膺督師

江南之命本有統轄該軍之責惟見值皖南危迫勢不能舍近而

圖遠且廣德復陷浙事日棘臣與兩處文報動多梗塞此嘉興上

海暫難兼顧之實情也諭旨垂詢江北一帶如何布置一節臣前

於五月十七日奏飭總兵吳全美李德麟師船全數下駛駐泊焦

山瓜州等處以通鎮揚兩府之氣而扼逆匪北渡之路又於七月

初三日奏派道員李鴻章興辦淮揚水師以護鹽場而輔陸軍無

非爲力保江北起見惟水師庀材鳩工赤地新立非數月所能就

緒臣俟皖南各城立腳稍穩乃能繞道馳赴淮揚亦非數月所能

成行側身東望焦憤實深都興阿疊奉諭旨督辦揚州軍務日夜
憂灼謀所以速行之法官文胡林翼亦百計經營謀所以資送之
法無如事多窒礙迄不能就不特三千勁旅五月口糧鄂省之力
一時難以撥付卽弁勇之心亦實不願遠行蓋自湘省至揚州繞
道五千餘里上游一水可通人多而氣聚下游百物昂貴人少而
勢孤同一應募之勇同一額定之糧其願就鄂就皖而不願赴揚
州者情也勢也以臣愚見淮徐等處風氣剛勁不患無可招之勇
但患無訓練之人擬卽函商官文都興阿等酌帶楚師千人先行
馳往仰慰聖懷到江北後用楚軍之營制練淮徐之勇丁嚴其
禁約寬其期限李鴻章往辦水師亦照此法行之臣明年馳赴淮
揚亦照此法行之餉絀而不改其常戰敗而不變其度期於有成
而後止若仗聖主洪福得一二名將出乎其間則兩淮之勁旅

不減三楚聲威此江北先行籌畫之微意也 上諭前因都興阿

奏屢調馬步各軍未經籌撥當經諭令官文等速調馬隊並得力兵勇三四千名派赴都興阿軍營帶往江北防剿隨據官文等將無可調撥情形馳奏復批令懷遵前旨籌撥矣本日據曾國藩奏稱淮徐民風剛勁不患無可招之勇而患無訓練之人已函商都興阿止須酌帶楚師千人前來江北到防以後以楚師之營制練淮徐之勇丁可期得力等語所籌係因楚軍無可調撥爲因才於地之計尙屬妥善著官文胡林翼卽行調派馬步得力兵勇千名配齊軍裝糧械令其速赴都興阿軍營爲數旣屬無多不得再行推諉都興阿於此項官兵到後著卽統帶啟程前往江北到防以後應如何於淮徐等屬抽調勇丁加以訓練藉資防剿之處卽著與曾國藩會商辦理將此由六百里各諭令知之○諭曾國藩奏

接奉諭旨統籌全局一摺據稱李元度等兵勇約須七八月間到徽左宗棠須九月中旬到徽到齊以後亟須分攻廣德救援甯國未能急議規復蘇常至嘉興上海亦暫難兼顧都興阿督辦江北軍務尙未啟程已函商官文等令該將軍酌帶楚師千人馳往江北到防後以楚軍之營制練淮徐之勇丁可期得力等語蘇省賊氛延蔓急盼援兵而該大臣部下兵將未齊驟難進剿亦屬實情著俟李元度等陸續到徽後應如何攻剿廣德派援甯國卽照議迅速辦理至淮徐勇丁可用都興阿卽可無須多帶兵勇前往江北所籌亦屬妥善再本日據瑞昌等奏探聞賊目李秀城住居蘇城並不設備賊數不滿千人時於胥盤兩門之外觀看田稻無錫城內之賊亦不過三四百人均甚畏民團等語蘇城之賊圍攻上海其空虛亦在意中著曾國藩確行偵探如該處及無錫兩城果

係賊匪無多卽著檄調勁旅閒道出奇前往規復亦不可失此機
會不必專俟兵勇到齊轉涉拘泥也將此由六百里諭令知之○
欽差大臣兩江總督曾國藩奏謝授缺恩得旨卿數載軍營歷練
已深惟不可師心自用務期虛己用人和衷共濟但不可無定見
耳○命怡親王載垣兵部尙書穆蔭爲欽差大臣往通州籌辦撫
局○命署戶部右侍郎袁希祖往天津查辦團練○丙辰諭內閣
王夢齡奏湖河漲漫設法籌堵撫恤一摺南河高寶等處因上游
山泉漲發挾同積潦下注當經道員朱善張將高郵車邏壩南關
新壩啟放並督率民夫赴工搶辦旋因風雨交作人力難施自露
筋鎮至金灣一帶無工處所聞段漫塌百餘丈小民蕩析離居殊
堪憫惻著王夢齡委派妥員會同地方官紳董趕緊設法堵築勸
捐籌辦並嚴飭各屬認真防護勿令再有疏虞其被水災民務當

加意妥爲撫恤○河南巡撫慶廉奏此次大股捻匪號稱數萬實有馬步二萬餘人蓄意西竄疊據探報匪眾攜帶婦女家小欲占奪城寨爲移家計因毫境匪巢被水淹浸盜糧匱乏糾眾西趨攻城破寨意圖久踞經我軍疊加懲創奪回萬集等三寨斬馘數千其勢已蹙總兵承惠等又出其不意鈔向賊前攔頭奮擊力解安平寨張莊之圍痛加剿戮逆眾旣無屯踞之區又斷其西北之路不能不折向東趨七月十四日五鼓承惠等追至柳河蔡集地方適關保撥赴邱寨之豫勝營勇會同民練遇賊接仗承惠等帶兵趕到督同參將百順等揮令馬步奮勇直前斃匪甚多奪獲賊物無算救出被難民婦百餘口該逆向東狂竄又該逆糾捻股馬步數千人聲稱圍鹿復讎承惠激勵兵勇誓殲醜類追至鹿邑以西距城十餘里維時關保派令參將馬春華等統帶馬步兵勇出城

迎擊承惠先會知府張曜等督飭勇隊繞由正南向東兩面兜襲該逆果糾馬步攻撲鹿邑西南城垣關保率同候補道趙連標等及地方官紳兵勇登陴守禦賊眾撲近城濠均經擊退馬春華等於城外合力夾擊鏖戰多時生擒髮逆張柱一名匪勢不支步賊先潰馬賊亦紛紛東竄關保隨飭趙連標等督帶陝甘官兵出城接應各軍一同追剿復有另股悍賊來援張曜等躍馬奮擊兩路伏兵齊出承惠督領全隊分路截殺我軍屢勝之後無不踴躍爭先轟斃殲殪賊匪數百名餘匪跟蹤鼠竄追殺二十餘里至鄭集地方復斃悍賊數十人落後敗匪及隱伏秫稻地內之賊沿途搜殺無數餘逆遁歸老巢承惠督同張曜等於十五日直抵亳城整隊駐紮豫境一律肅清懇恩俯准將尤爲出力之總兵承惠等分別獎勵 上諭亳州擒匪大股數萬竄擾豫境疊經官軍痛加剿

戮餘逆遁回老巢豫境一律肅清所有尤爲出力之河北鎮總兵承惠著賞加提督銜候補知府張曜著免補知府以道員補用其餘打仗防堵出力之員弁兵勇著慶廉查明保奏候朕施恩○諭軍機大臣等據桂良等密奏一摺見在英佛以條約未定卽欲帶兵北來本日已命怡親王載垣尙書穆蔭卽日前赴通州見在先給照會杜其進兵著僧格林沁卽日蓋用欽差大臣關防封妥派委員前迎投遞毋稍遲誤將此由六百里加緊諭令知之○丁巳僧格林沁等奏通州布置情形得旨見在議撫之王大臣料已行過通州惟不知此時已見仗否若尙未決裂僧格林沁等斷不可輕於一試總期於撫局有絲毫之益實爲萬幸也○欽差大臣桂良等奏節次遵旨辦理夷務情形得旨桂良恆祺著卽赴通州候旨恆福著仍駐津郡○以辦理夷務未能妥協撤大學士桂良直

隸總督恆福欽差大臣武備院卿恆祺幫辦大臣命將欽差大臣
關防交怡親王載垣等祇領江蘇委員藍蔚雯等仍聽候差委○
賞還科爾沁親王僧格林沁三眼花翎○予江蘇殉難訓導惲彥
昌祭葬世職○戊午諭內閣毛昶熙奏連年鄉團殺賊遇害未經
請卹等語據稱河南歸德一府連年鄉團殺賊出力管帶團勇屢
戰捐軀者殊不乏人未經請卹其帶團禦賊著有成效者亦未查
明請獎著慶廉將所有連年鄉團出力陣亡殉難並辦團有效人
員迅速查明奏請分別獎卹以後遇有鄉團應獎應卹之事卽著
毛昶熙查明分別奏請恩施○諭軍機大臣等本月二十五日兵
部遞到俄使伊格那提業幅咨文一件據稱欲於英佛二國欽差
進京之後暫遲數日啟程赴京等語此次俄夷尾隨英佛前來卽
使阻止諒亦未必肯聽茲已由軍機處咨覆令其俟英佛二國議

定後再行來京此刻正在商議之際不必前來惟該夷若知載垣等出京伊亦必來見面議此事該王大臣等亦卽照軍機處咨文答覆可也○諭駱秉章奏遵旨督辦四川軍務見在籌調湖南湖北兵勇並請令左宗棠入川各摺片所奏請令左宗棠襄辦軍務一節前已有旨令該員勿庸入川仍著襄辦曾國藩軍務矣昨據瑞昌王有齡薛煥等奏均以蘇常糜爛不堪上海鎮江等處情形危急苦無援兵非曾國藩一軍入蘇不可而曾國藩又以左宗棠等募勇未到不能前進駱秉章既有劉嶽昭等隨同前往著卽飭令左宗棠迅速帶勇仍赴曾國藩軍營另片奏皖南協餉無從籌撥等語所有皖南軍務前經降旨統歸曾國藩督辦皖南防兵爲數不少見在甯國被圍日久亟應籌撥餉糈以圖進剿曾國藩所帶兵勇又係楚軍自應仍由湖南接濟該撫等素顧大局自不可

意存膜視著駱秉章文格仍於湖南設法籌措按照部咨每月如數撥解皖南軍營以濟要需至石逆見雖距蜀尙遠而入蜀之滇匪擾近省城賊勢猖獗東純已在湖北病故昨命崇實暫署四川總督該大臣未諳軍務在川楚軍無人統馭恐不足恃駱秉章卽當催齊募勇迅速入川以清蜀境毋再遷延將此由六百里諭令知之○諭前派毛昶熙督辦河南團練事宜諭令按照載垣等會議章程妥爲辦理本日據毛利熙奏河南團練以歸陳二府爲先

前勝保因調團不齊勒派百姓出資雇丁統計勇糧運費較正供多至倍蓰百姓苦累近日紛紛稟請以抽丁一項民力已竭鄉團勢難再辦其開封等府百姓聞歸陳雇勇之苦亦復觀望不肯實辦團練之事仍恐有名無實等語用民之法總宜深得民心勝保等所辦章程旣與民心不洽自應改絃更張以期得力著慶廉體

察情形將此項雇勇酌量裁撤毛昶熙卽按照載垣等會議章程趕緊集團練勇以輔兵力勿令捻匪乘虛竄入並著該團練大臣和衷共濟務使紳士與地方官聯絡一氣辦團方有成效將此由五百里諭令知之○以江蘇禦賊出力賞巡撫薛煥頭品頂帶餘升敘有差○已未調安徽軍營甘肅甯夏鎮總兵官鄭魁士赴江蘇鎮江辦理軍務○庚申諭內閣朕廑念兵艱中心惻怛若令枵腹荷戈馬能責其用命疆場茲由內發銀二十萬兩普賞防堵巡防各兵丁以示激勵人心之至意○辛酉諭內閣杜翻奏請仿照河南章程調遣官兵等語著山東巡撫文煜飭令各營將弁將額設官兵認真訓練遇有緩急由團練大臣調遣與民團相輔而行以資得力○諭軍機大臣等僧格林沁瑞麟奏夷人逐日前進其意必至通州見在嚴陣以待以備截擊一摺據稱載垣等接英夷

照會仍欲赴通商議經載垣等復又兩次給與照會該夷並不照覆仍往前進載垣等見已折回通州據探前隊已至河西務僧格林沁等見派格綢額督帶馬隊駐紮安平俟探馬到時卽攔阻毋令再行前進如不聽從卽行拏獲後隊儻越過馬頭卽著僧格林沁等迎頭截擊該大臣等惟當激勵眾兵同仇敵愾以副朕望載垣等若仍畱通州恐兵士猶謂尙欲議撫意存觀望已諭令該王大臣察看情形或尙可暫畱或卽行回京斟酌辦理○諭李若珠奏滬城解圍見又添兵往援並金壇失守各情形一摺逆眾圍撲上海經在城文武奮力擊退守城兵勇不過千餘人見在逆蹤尙在數十里內各處援師未到自應令向奎一軍迅速前往乘勝進攻力保餉源重地金壇固守已逾數月守備馬得勝與賊潛通川勇約期內應遂致縣城失陷兵勇逃至鎮城者已有二千餘人見

正當招集潰散兵勇之時難保無此項兵勇混雜其中潛至鎮城應募著巴棟阿嚴密稽查如有川勇逃至鎮城者責令各營將弁隨時查出卽行正法毋使奸宄溷迹致貽後患將此由六百里諭令知之○命候補三品京堂勝保簡練精兵親自統帶於通州以西擇要駐紮並命直隸山東山西陝西各督撫飭催前調官兵星夜趲赴通州聽候調遣○予安徽陣亡副將于昌麟四川陣亡通判繆榮吉等祭葬世職○是月賑湖北沔陽等十一州縣湖南澧州等八州縣被水災民蠲緩山東濱州等三十二州縣及濟甯等衛被旱被風被蟲被雹被擾莊屯新舊額賦撫恤福建澎湖廳遭風災民